

摘藻堂四庫全書薈要

集部

欽定四庫全書薈要卷一萬六千二百七十一

集部

靜修集卷十五

遺詩三

元劉因撰

五言律詩

三十
六首

書堂旅夜

丈室不自掃寸心徒爾豪世途仍險阻風物故蕭騷皓
月霜洗淨明河天放高空庭一片石獨坐首頻搔

過唐水望堯山

神化大無外名山能幾峰威顏渾咫尺天日尚雍容蒲坂堪饑死重華有舊蹤三謨讀未老於此卜巢松

過奉先

閏遼承宋統此志亦雄哉置縣名猶在因山勢已摧百年元魏史千古汝南哀華表鶴應有悲風海上來

雜詩二首

聞昔飛狐口奇兵入擣虛人才九州外天道百年餘草木皆成騎衣冠盡化魚遺民心膽破諱說戰爭初

關嶺通山後風謠採路傍地寒人好壽草淺畜宜羊
水如奴婢從川貯米糧西風如有約乘興即吾鄉

野興

莽莽榛蕪路蚩蚩魚肉民乾坤幾逐鹿今古一傷麟
眼底人間世胃中物外春江山滿花柳無負百年身

秋日

山人久不出今朝天氣清秋光濃可掬草色翠相迎
雖暮山碧敲門新筍生歸來重回首佳處未忘情

山中憶故人

故人南郡去消息久無聞
瑤草正堪種白雲誰共分
屋梁驚落月鵬翼賦垂雲
歲暮一樽酒高歌如見君

夢採松脂及甘菊

棲遲負松菊夢寐得甘馨
隱逸喜同臭流高味獨青
人誰借三徑天欲制頽齡
毛骨清猶在枕邊霜露零

種杞

法出千金要畦容一席
分灌苗身已健採實夢先勤
白

棘憑誰辨靈庇只自聞知音九節杖惟有華山雲

戲答人送鹿皮冠

麋鹿山林性文章冠冕材頭顱如有此巖穴更悠哉老
筆天機在空梁月色來桃推應似我人世莫驚猜

觀藥爐自戲

二首

無病不服藥

康節語也

此懷清更嘉歐陽或有道韓子豈無

瑕羸疾嗟予久名方信彼誇回頭謝鷄犬何日是仙家

退之服硫黃一疾訖不痊樂天詩也赤松共游也不惡
誰能忍飢啖仙藥已將壽夭付天公彼徒辛苦吾差樂

東坡序歐陽子語也

地髓服仙草苗精失採花徵求遍親友炊爨罄樵車屢敗從人笑偶成容我誇側聞僮僕語辛苦是仙家

閱竇氏名方

人從大節論士尚絕無求獻可有先見老衆多遠憂方書空物齊耆舊盡山丘矯首候斜日窓中倦鳥投

眼醫詩卷

火景元中暗月光徒外明每當天抹漆未便目無睛暗

自何年有明從底處生若知當告我心事在蟾精

褚母節孝詩卷

寂寞吾鄉國才難婦愈賢題評慚我後旌表聽人先艱
苦初心盡安榮老境偏幽潛天有待留看百來年

張監院過

有客敲門久山人與鶴歸論文翻草本換酒當蓑衣暫
會還成別相歡且莫違明朝誦佳句北望謾依依

寄彥通

吾子今應健山人老已癡迷藏高着眼興廢大觀慕感
遇渾非昔忘懷若有思絃歌吾舊隱寂寞暮春時

送友生

無人慰幽獨之子罷登臨野鶴籠中態翔鴻天外音吾
儒闕世運晚節見初心有問山間事白雲今更深

盧學士按察江東

不廢芻蕘賤狂言試一聽品題停月旦言動律東銘飲
少得真樂吟多損性靈清燈四書外澹泊養遐齡

郭判官按察廣右

謝病三公掾分司五嶺南柱山天下秀憲府百僚叅夜
泊防風浪晨征避瘴嵐遙知慈母念先汝過湘潭

張察院分司臨安

餘杭古佳麗御史重分司甘旨足為養江山能助詩梅
花春早晚潮候月盈虧糾察先從此陰陽恐失宜

送仲常游北岳

大茂玄都閔它山拱萬靈風霆凜神化河海盡襟形昂

畢空留影幽并未了青追風王制變僭祀世塵腥禮樂
心雖切煙霞骨有銘長懷七十戶為我謝僊局

送郝季常赴正陽幕

上黨清涼界超然慕白雲名家得之子勝境苦平分鼓
角生新壯詩書失舊勤江淮古形勢有樂在從軍

送成都術士

邵子不言命相逢盡此觴風煙雙白鬢身世一青囊玉
壘浮雲變峨眉落日蒼西游吾有意先為謝嚴揚

宣慰孫公慶七十詩

并序

至元二十七年冬與處士張君察院張君提
舉郭君都事張君飲教授趙君所工匠提舉
孫謙繼至察院曰是家古世官也將甲氏四
世矣今其翁正議公階是為宣慰使歷事四
朝登秩二品有子若孫皆佩金紫開歲七十
尚躍馬不衰維爵與齒實一鄉之望凡所與
游禮宜往慶在吾輩慶宜有詩於是約各為

詩一首言韻古律不拘既成俾諸孫捧觴歌
以獻壽公宜每篇為盡一觴不辭十二月二
十九日樵庵叙

為仁存世職得壽見陰功家產千金厚官銜二品隆子
孫皆貴顯飲啖尚豪雄五福誰全備吾鄉有此公

何太夫人壽 二首

近親宜致敬結友合升堂薄俗隨遷變淳風墮渺茫
人今復古此日得稱觴高詠靈椿句燕山暮色蒼

去歲稱觴後今朝重過庭將軍不好武宅相舊明經拙
宦供行樂忠臣見典刑北堂多竹石歲晚亦青青

示張源

堂高餘慶在道重魯齋傳洗眼名家後驚心大學年白
頭負風鑒青佩見時賢明日鹿門隱須君拜我前

哀徐生

去歲登高句霜楓秋幾多東籬成惡識西郭動悲歌天
道憐渠在吾文柰爾何送君紅樹下風葉尚吟哦

生且死求

予銘為不朽計東
籬事見擊壤集

烏古論顯之母夫人挽章

冠帔金源舊門闌戚里榮鶴悲人世短銅泣露樂輕往
事驚波去新墳宿草生烏啼原上樹霜月有餘清

侍其提學哀挽

初遠過庭訓擇隣得子賢春風渾一月恩制欲三年步
武思猶在頭顱愧所憐念親朝感舊欲語淚如泉

名鑒張國綱挽卷

良鑒不出戶真隱要逃名宿草今如此春風宛若生一
囊三世藥兩子萬籊金平昔憂多病懷賢倍有情

劉仲文挽章

并序

仲文名郁析州蒲陰人少從事臺府軍謝病
歸杜門不出以春秋左氏學為業所居里名
黃臺因以為號後仕京師為將仕郎年六十
餘命酌賦詩而終子元令為太常奉禮郎

楚塞十年役黃臺一室春從軍有何樂學道不知貧生

子為名士居鄉稱善人死生無所恨今古一丘塵

感事

間氣來西極逢時稱世賢學隨人望盡家要後生傳
魏野赤松句堯夫樂社篇卜隣闕聞訃重淒然

贈答徐生

三年不窺牖城府有山深於道無少得多君肯見臨
一盃上地飲千古水仙音為子終宵話相期勞寸心

七言律詩

三十
二首

晨坐

共笑龕中坐已癡環堂燈火誦聲遲人才興替世所係
瓶水溫涼天可知差健每因多病後一寒偏怯欲明時
三年馬隊成何事採菊南山舊有期

與客會飲野亭

遙岑一碧淡相依野態行雲共意遲多病留侯寧復偉
長身諸葛但如癡相思千里尊酒盡永嘯一聲小鳥悲
風袖翩翩似何處青林西北雨來時

過徐橋

老岸石闌曙色分只疑身是入山雲
十年往事不回顧
百里清泉如可聞
人世誰教有長路
坤靈終亦化塵氛
興亡更遣陂塘在
幾欲悲歌酒未醺

白溝

寶符藏山自可攻
兒孫誰是出羣雄
幽燕不照中天月
豐沛空歌海內風
趙普元無四方志
澶淵堪笑百年功
白溝移向江淮去
止罪宣和恐未公

過東安趙宋先塋

五季風煙慘晝霾渠兒有志亦雄哉累朝禪策皆虛器
千古黃袍又厲階文物漢唐今已盡史編南北更堪哀
荒墳一品知何處猶遣石麟草半埋

過東安

干戈天亦厭紛紛豪聖千年共幾君太祖無心亦徒說
吾兒有志更誰云悲歌莫管千秋後王氣應無一品墳
今古區區等如此五陵哀鴈入秋雲

登武遂城

神州英氣鬱高寒，臂斷爭教不再連。
千古傷心有開運，幾人臨死問幽燕。
平生卧榻今如此，百萬私錢亦可憐。
咫尺白溝已南北，區區銅馬為誰堅。

登中山城

黃金一夕冷如鑛，劉項蕭然恐未真。
世事惡盈應有數，天心撥亂豈無人。
陵遷谷變橫流地，卵覆巢傾死節臣。
毛髮諸孫生氣在，九原精爽凜猶新。

予曾伯祖奉議府君貞祐初死節中

山而舉
族沒焉

望易京

亂山西下鬱岌堯還我燕南避世謠天作高秋何索漠
雲生故壘自飄蕭誰教神器歸羣盜只見今人泣本朝
莫怪風雷有餘怒田疇英烈未全消

七月九日往雄州

秋聲浩蕩動晴雲感慨悲歌氣尚存灑落規模餘顯德
承平文物記金源生存華屋今焦土忠孝遺風自一門

白髮相逢幾人在蒼煙喬木易黃昏

武陽故臺

仁義徒令此舌存轍環初不抹紛紛天公欲為秦漢計
野色更無燕趙分滿眼兵塵餘故壘一聲樵唱入秋雲
擬乘碣石觀滄海易水東流去不聞

鄉先生漢韓太傅嬰墓

章句區區老益堅百年軻死已無傳四詩今併毛公廢
三策聊存董相賢祀典曾聞鄉社在荒墳重為里人憐

絃歌燕趙今誰見高咏周南獨慨然

定興文廟枯杏復花其尹求詩

縣吾奉議府君故治

手澤天教檜葉存窮鄉枯朽亦霑恩敢將吾道論榮悴
且喜甘棠見子孫但使儒林有根柢會看寒谷變春溫
題詩當作諸公唱百里東州又故園

宿華陽臺

石徑盤盤擁亂霞雲間雞犬是誰家空山月出人境失
高樹露涼秋氣加蜀道青天休種杞武陵流水漫尋花

太行東北三千里盡借晴嵐染鬢華

又

夙志經綸尚未乖消閒人去只蓬萊龍門正要書堂在
天柱誰分戶帖來雲外久遲黃鶴至夢中曾採紫芝回
秋風何日飛來得重免移家載酒陪

飲聞雞臺

出門人事厭紛紛春色三分已二分十步離山九回顧
一杯到手百無聞蒼茫天地有如此磊落古今何獨君

欲向荒臺問遺跡水明沙浦只行雲

宿鄉僧致公房

倦客歸來借夕眠偶因相敬識君賢
常勤有酒邀陶令每愧無衣謝大顛
謂暢墨名聊汎應論周陰助豈誠然
平生親切冠巾語欲發還休亦可憐

九月晦日過鎮州宿趙徵士皇極道庵

慘酷姦訛禍世親翕張那復見真淳
歲來龜六終留殼調中狙三已自塵
符藥真能度衰俗樵漁却恐有幽人

摩挲石刻皆名筆庭下寒花不似春

道庵取象
龜藏六

宿趙山人房有懷

書劍南游氣吐蜺歸來華髮首難低江山應識千年鶴
豪傑空慚半夜雞物外有天藏太古人間無地種丹萸
相思日暮一杯酒望斷碧雲何處棲

宿龍宮

擬欲題詩贈白雲且傾濁酒洗塵氛閒將談笑論當世
卻喜稱呼是隱君天柱舊曾分戶帖神林今又有移文

夜深長鈇悲歌罷此曲山靈恐未聞

玉乳峯

亂山如擁欲爭先
惟許孤峰入馬鞭
舊見劒光曾犯斗
誰教箭筈亦通天
只應絕頂千年石
中有齊州九點煙
安得凌雲乘此去
東游滄海看桑田

洪元宮

明日擬
到天城

樹邊平野接晴霞
脚底清江走白沙
方外道人留客住
門前塵世倩山遮
自慚爛賞無多暇
更有行窩第二家

煙雨兩坡皆古木興來便作上天槎

唐張忠孝山亭故基

斷碑藩鎮記當時杯酒談兵少牧之山色何曾間今昔
人才初不限崇卑水波風起心猶壯木杪秋生鬢已知
莫更候雲臺上望武陽禾黍亦離離

雙清空堂遺趾

心遠由來地自偏若分心跡已非賢結廬人境元無害
跨鶴揚州更兩全石頂經龕有隨處山中學館竟何年

馬頭果要為初祖擬問西巖借一厘

張氏西園

水府生煙晚更蒼翠陰含雨暗生涼人間豈有赤松子
天上應無綠野堂一日平原驚客散千年郭隗又臺荒
誰教老樹夕陽在留與憑欄遣興長

賈氏溪堂

澹澹春波遠更宜丘山華屋總成非來今往古年華在
厚地高天人力微世上紅塵無此客杯中明月有清輝

燕南盛事君須記曾為東湖盡醉歸

總謁山寺

石田霜落晚蕭騷一徑禪扃亦自高
九萬里風安稅駕三千世界等秋毫
山哀自苦天相罩秋老不禁詩太豪
西望雙龍有高隱結庵終擬近林臯

會飲北山

相逢相飲莫相違往事紛紛何足悲
別後幾經滄海淺歸來豈止昔人非
此山變滅終如我後會登臨知與誰

今古區區等如此不須辛苦嘆斜暉

暮春山游

萬山傍遶翠爭新兩澗平分月有鄰
木杪柴關如看畫松陰苔徑欲凝塵
浮雲柳絮人間世流水桃花物外春
杯酒狂歌極浩蕩野煙晴樹望中勻

春日游山

川氣迎晴澹作春泉聲招客浩如神
隨時俯仰有魚鳥乘興往來無主賓
碧水白鷗心共往浮雲蒼狗態誰真

平生經濟程夫子年少看山意已親

不是吾儒本經濟
等閒爭肯出山來

明道少作也

西山雅會

山色舊無今日濃
雅期新得與君同
曾懷霽月千年後
尊酒春風一月中
靜裏乾坤無彼此
眼中花柳各青紅
高情久已忘琴了
誰管殘陽送去鴻


水北道館

會從氣朗看春朝
始信蘭亭水石遙
物外壺公能避世

山中巢父不知堯波間明月隨吾取松上白雲如見招
曉策重來有成約無妨談易對漁樵



靜修集卷十五



總校官庶吉士臣張能照
校對官檢討臣盧應
騰錄監生臣夏毓圻

欽定四庫全書薈要

集部

靜修集卷十八

六至

詳校官助教臣謝登雋



欽定四庫全書薈要卷一萬六千二百七十二

集部

靜修集卷十六

遺詩四

元劉因撰

七言律詩

五十首

有懷

百年身世付秋毫
萬里雲霄有羽毛
樓上詩成山欲動
眼中人去氣誰豪
崔嵬自可兄呼石
憔悴直須僕命騷
尊酒論文復何日
西風迢遞暮鴻高

九日客至

有人車馬訪柴桑怪見寒花滿意黃
莫對西山談世事試將華髮照滄浪
淵明不與白蓮社程子猶憐綠野堂
他日燕南話耆舊此回風味亦難忘

除夕

莫道春風室罄懸試看孤影伴頽然
浮雲往事空千變清鏡明朝又一年
頭上無繩繫白日胃中有石補青天
幾時能了西山約六角黃牛二頃田

秋夜

已喜山深稱野情，每慚無物慰諸生。
人貧日課不時睡，雞為誦音長早鳴。
病後端居信張詠，靜中未發有延平。
誰知今日絕絃意，卻恐人間知此聲。

又

坐困沉思強起行，虛庭涼露下無聲。
為爾寂寂人莫嘆，不肯碌碌君何成。
萬古興亡天亦老，百年身世夜難明。
情知不為學仙去，也欲蓬瀛寄此生。

新厯

山家厯日年年有林鳥園花報四時建成預求尋藥月
逢辰要及種瓜期胷中堯典二三冊夢裏幽風第一詩
餘韻千年宛如在晴牕捲卷不勝悲

偶成

自覺筋骸老漸頑曾經堅脊度危關清霜烈日留身後
秀氣春風滿座間復有頽波知底柱莫教秋色避南山
雲鵬稅駕今無地羨殺江鷗儘日間

放謔

莫道人生能幾何
金銀宮闕亦無多
垂楊流水輕風裏
碧落銀河暮雨過
天地此身真逆旅
雲山到處是行窩
九原喚起堯天老
我舉一杯君試歌

野興

得意江山入酒尊
乾坤英氣未沉淪
莫思世事無身事
不薄今人愛古人
明月清風無盡藏
野花啼鳥一般春
客來惟說烟霞好
只恐先生醉後嗔

秋郊

行過青林徑欲還誰家茅屋在林間雲初湧出半含雨
風漸吹開微露山世味嘗來知懶貴物華老盡覺秋閒
天教勝境為詩敵未許幽人穩閉關

西湖

水竇深藏十畝煙賣書真欲買魚船數椽破屋已自足
四海虛名良可憐醉後不知清露下興來擬共白鷗眠
漁溪謾有當年志老去而今只愛蓮

對菊

迂疎不辦一身謀
髣髴空添四海憂
畫本流民今復見
詩家進屋為誰留
黃茅安得千間厦
白布空歌萬里裘
政有南風曲中意
可能獨醉菊花秋

憫旱

農父看雲淚亦乾
靈湫誰信欲生煙
萬金良藥汗猶出
一寸丹心天可旋
未便無食思樂土
不禁憂國願豐年
為瞻河漢中宵起
獨對殘燈理斷編

城樓待雨

雨入江樓勢欲吞
雷轟何止語難聞
未憂彼岸將為壑
只恐吾山盡化雲
風伯為誰能卻敵
物華依舊嘆如焚
百年人事今如此
猛拍闌干怨夕曛

溪光亭看雨

萬山齊擁白煙來
木杪先聲失怒雷
海岳奔崩換毛骨
乾坤收斂入胚胎
龍公所蘊有如此
塵世一清何壯哉
坐看神功空束手
夕陽華髮對蒼苔

積雨

萬象何為入杳冥，懸知物外自高明。
前年憂旱有今歲，半月閉門如一生。
捧日謾勞中夜夢，補天誰識寸心誠。
陰雲政使高千丈，坐愛魚頭恐未平。

秋霖

春旱泥倉恐謾傳，誰從得雨得豐年。
麻衣有垢供秋藓，土銼無文換曉煙。
果為松薪禁明月，真教斥鹵變桑田。
胷中幾許晴霓在，四海霖靈獨慨然。

次韻閔雨

已酉豐凶不偶然今年千里土生煙夢游樂國每嫌覺
關見仙雲猶酷憐畢竟蛟龍思得雨何勞蟣虱謾呼天
山人萬慮消磨盡惟有憂農阻靜便

癸酉大雨次人韻

黑風吹海入天瓢誰信銀河直下潮渾沌只疑還太古
規模應欲復唐堯衣冠半夜方孤坐塵溷千年共一漂
且喜開簾見白日不須隴畝問秋苗

海南鳥

越鳥羣飛朔漠濱
氣機千古見真純
紇干風景今如此
故國園林亦暮春
精衛有情啣太華
杜鵑無血到天津
聲聲解墮金銅淚
未信吳兒是木人

白海青

一名玉爪駿

扶餘玉爪舊曾聞
青鳥猶霑海氣昏
掌上風標有如此
眼中神駿更憐君
平蕪未灑頭鵝血
春水誰開獵騎門
過鴈昏鴉莫回首
霜拳高興在空雲

爆栗

山家愛客夜留連，奮發驚聞一栗先。
鑿竅誰言無渾沌，弄丸今喜得天全。
香甘合用金甌選，冷淡那容玉版禪。
回首燕秦幾陵谷，眼中繁富竟何年。

近世人家避栗
稅往往伐去

醉梨

白雪春香洗未殘，玄霜誰遣凍成團。
沫封圓顆盤增滑，蜜和濃漿齒避寒。
綠蟻從今忘病渴，金花無地着餘酸。
快人風味依然在，莫作尋常軟熟看。

飲江漢白

高亭飲興動江山為捲灘聲入座間糟麴真能釀滄海
魚龍直恐盡神奸襄流謾說葡萄暖仙國曾分玉液慳
聞道兵塵埋楚甸一杯誰與洗愁顏

薔薇酒

顏色醪醕茉莉香琉璃到手會須嘗一杯滄海泡成幻
萬古花菴醉有鄉涼冷併收天水碧輕浮猶帶女真黃
錦囊盡貯春風在別是仙家不老方

服食家有
餽薔薇法

黃精地黃合釀甚佳名以地仙酒

仙家名品對嵯峨誰信幽人用物多酒面白雲招我在
杯中華髮奈君何西山秀氣斲欲盡易水寒聲釀亦和
未望天行至千歲舉觴當和紫陽歌

雲卧天行非子敢
議守一處和千二

百歲晦翁
調息箴也

玉柱雙清香

二氣元從太極分浮雲起滅見來真白虹貫日豪華散
底柱中流意象新方寸有靈涵大塊頭顱無物隔蒼旻

藍田萬頃煙生玉未辨晴牕半穗春

心無外體無間
吾薰爐銘也

玉簪

花中冰雪避秋陽
月底陰陰鎖暗香
玉瘦每憂和露滴
心清惟恨有絲長
且留宛轉圍沉水
莫遣聯翩入粉囊
只許幽人太相似
蒼苔疎雨北牕涼

反垂柳短吟

偃蹇高松雪謾飛
最憐憔悴綠楊枝
青絲曾識鶯聲軟
黃葉俄驚馬足遲
有分只偷春色早
無心要結歲寒知

不應再得東風力更與行人管別離

次韻劉尚書尊號禮成

萬姓瞻天仰泰階老人星現五雲開
混同直擬千年論積累無從百世來
含哺豈能逃帝力有根無不待春雷
舉頭日近長安遠葵藿傾心即壽杯

答或者以所注孫子見示

二首

學術兵農豈盡無規模如此亦區區
權書不免增多口霸論誰教混一塗
親手申韓如果有許身管樂未全誣

千秋萬古中庸在留與橫渠作後圖

晁公武讀書志有橫渠少年註尉繚

子一卷一

誰遣歐陽筆有神微詞端不赦堯臣樵夫見笑寧無媿
童子羞稱亦可人但得躬畊全性命猶勝偏霸在風塵
勿堯一語宜深聽樓上元龍且莫嗔

次韻答范陽郭生

默坐誰窺樂境深無絃初不用知音曲肱睡起亦何事
弄月歸來徒自吟多媿寄書勤訪道未嫌傾蓋即論心

西山百里平如樓欲認東州煙雨侵

次韻答趙君玉

萬古西山翠不休一菴今在白雲頭
開軒招月淡相對倚杖聽泉清可收
已喜凌空有高興豈知卧病阻同游
南湖燈火十年夢舊好何時得重修

來詩有千巖萬壑
春風動安得凌空

訪靜修之
句故及之

傅彥和壽予詩以韻答

遯世今成僻立山傷時時復井生澗
希夷老不留張詠

康節初曾笑謝安歲月如人雙鬢老江山分我一杯歡
因君喚起扁舟興擬畫臨流白帽間

次韻答王之才見寄

蕭蕭霜葉打牕疎耿耿寒燈伴獨居鄉議謾評康節僻
後賢方識子雲書詩成已破三緘戒臂穩因思九折初
明日相望在何處青山佳處即吾廬

次韻答張夢符

癯然一榻卧成痕多病人疎自古云執別三年猶念我

開緘千里若逢君家聲舊仰遼東鶴才望今稱冀北羣
每憶琴尊前日雅幾迴搔首賦停雲

寄張之傑

便擬庭闈捧檄過直須隨俗苦揚波一瓢有樂誰云細
三釜無歡亦謾多戰國遺風餘管樂南朝清議尚王何
見人時樣知吾拙獨誦滄浪太古歌

寄彥通

青芻白飯思悠然燈火山亭暮雨前不意相思渾百里

直教一別動經年以甘分席樵夫下敢望過門長者先
自是煙霞愛招客可無佳句助清妍

示彩鱗

相思擬話百年情燈火直須幾徹明繼志未論班氏史
隆師何用鄭公名人間忠孝寧無責學術淵源先有盟
欲寄君詩仍感泣野夫能有幾門生

示有寄

南隣新膾北隣醅莫忘蓮湖舊釣臺根底自宜留故土

焰中真見有寒灰短長無就相形看消息當從既往推
遙想西城共登眺水光山色亦悠哉

付阿山誦

十畝荒田不自耕半空樓觀幾時成人因遇困方言命
我為求奇反喪名此去要知燈是火向來空指鴈為羹
新詩銘在山童口百過高歌告乃兄

送董巨濟尋親

花繞東隣竹馬鞭春隨西舍板輿肩白雲尚在樓遲地

綵服俄驚喜懼年樵爨定知生處樂兒孫多向老來憐
阿翁別後還家夢比擬思親恐未偏

送人官浙西

江海十年幾戰酣劫灰飛盡到畊蠶亂離文物想猶在
凋弊徵科恐未堪眼底興亡即今古胷中形勝欠東南
因君漸有扁舟興佇待清風洗瘴嵐

送人官吳中

天撤藩籬要混通古來佳麗數吳中送君如對秋風起

恨我不隨江水東
五瘴可妨鄉土異
孤雲須念母心同
畫圖留取風烟看
莫趁并刀一剪空

張仲賢宣慰淮東過余山中臨別贈詩庸見定
交之意云

昨夜相逢終夕話
今朝送別百年情
世緣盡付禪心在
官況併隨詩境清
此日抹焚猶有望
他年勇退豈無盟
知君苦愛希夷老
莫厭山深不寄聲

郭太守提舉松江

蔡公聲望動江東應識頭顱肖外翁陵谷初經新化日
尊鱸不似舊秋風看雲正要忘憂計避瘴無如寡欲功
萬里吳松憑寄語并刀明日試曾中

贈韓道人

積學輸君氣稟真曾中鵬賦自凌雲靈砂換骨知何物
道錄降心亦謾云銅泣露槃經幾見鶴言華表竟誰聞
風流大父承平事賴有當年李少君

韓及識余先大父今百三歲矣

贈司馬道士

仙界清涼亦陸沉
風流儒素渺難尋
白雲自解留佳客
青帷端能爍壯心
知己未論鵬鳥賦
移人先聽水仙琴
野夫近有南來興
乞我庵前十畝陰
司馬氏陵川名家
陵川或謂清涼境
界

贈趙丈八十詩

并序

趙文宇澤民金義宗初年應科中天律下第
一授商州知法尋除左部檢法遷新息令北
渡客順天中統初擢為左三部司正致仕景

州判官為人樂易寡默嘗與先人同應真定
宣撫司辟召故予以父執事之今年八十餘
里人好事者榮其壽諸公為賦詩而求余倡
焉

律學專門自可疑更從報施論心期干戈留在三章法
松菊歸來兩鬢絲再世通家惟此老百年涉世亦吾師
平生辦作者英序慚媿曾中壽域碑

都山劉丈九十詩卷

感事還悲負米身此生無復九齡親
干戈誰共知年喜天地猶全愛日真
只擬商顏亦秦土豈期唐水尚堯民
胸中壽域平生在開卷題詩覺有神

訾相士詩卷

形聲感物即天成善惡因心有相生
人事百年隨反覆天容一日幾陰晴
僕夫茗椀何妨共廝役王門未可輕
不向訾家洲上醉胸中風鑒恐難平

題贈郗道人詩卷

開卷烟霞莫著人紫芝瑤草憶芳尊
法筵古禮存三代野服遺風見一痕
唐水堯山猶樂國葛洪張果有仙村
何時輦母東隣了老婦烹茶自應門

哭申也

悲來思汝不可置揮淚問余何所悲
青欲出藍今遽爾白能受采復誰期
粥杯屢進知君篤藥裹親嘗豈我欺
從此塵編只獨理不堪燈火夜涼時

哭王之才編修

草草離觴記去年誰知此別是終天傳雖成癖今安用史
未為榮應自憐四座高談宛猶在一經白首竟無傳
交朋日與來書少不過西州亦泣然

千戶喬侯挽詩卷

拱木秋聲尚凜然平生鄉國愧幽燕千家聚落郎山砦
四海牢籠勅勒天龍虎風雲空一夢關河形勢記當年
重侯累將應須念創立艱難亦可憐

孫沁州哀挽

驚看哀誄為君傷一面十年不易忘秦府舊稱天下選
燕人元有北方強平生豪氣餘丘土寤寐神交只月梁
聞說條陳有遺草承家洗眼看髯郎

靜修集卷十六

欽定四庫全書薈要卷一萬六千二百七十三

集部

靜修集卷十七

遺詩
五

元 劉因 撰

五言絕句

十五首

偶成

夢回聞雨聲忽覺是風葉問余何以知仰見梁間月

偶書

二首

累累山下塚渺渺嶺頭雲歲晚不歸去笙鶴應望君

昨日宋人苗今日牛山木寄語茫茫人管取牛羊牧

明珠穴

山從何時裂珠去誰當還餘光爛猶在照我方寸間

盆池

有月漸秋影無風生小波澄心一相對今夜興如何

溪橋步月圖

山中有幽人獨步溪橋月莫問興如何披圖亦清絕

出花

下石綠珠井灸面昭君村坐令宜花地亦復愁移根
史處士挽章

平昔未相識幾回曾寄聲今朝聞謝世便有故人情
春露亭書

老樹含春容寒泉動幽響念彼山中人風露恣清賞
觀石佛有感

明月雲如洗白露春自生石邊有枯木風至亦知鳴
呂洞賓畫像

微茫洞庭曉瀟灑崑崙秋海蟾生碧天相從何處游
絕句

溪童出門望鷗鷺滿空下江水淡無清盡是忘機者
鴈圖

夢迴烟水寒鴻鴈驚不起道人心又閒相忘有如此
商方爵

商爵既云古那堪形更奇不宜燕市酒雅稱野夫詩
筭盤

不作甕商舞休停餅氏歌執籌仍蔽簾辛苦欲如何

七言絕句

七首

顏曾

二首

陽光浩蕩歛秋容陰景深沉暖漸融萬古顏曾留意象
洪爐春滿聖門風

剪冰成雪舊知冰搏雪成冰見未曾到底春風同一貫
要從此地識顏曾

顏愚德

曾魯質

雜詩

五首

老兔雛雞自有春
壺冰澈底照來真
驢鳴畢竟渠皆聽
解識天機得幾人

水華庭草思悠然
風月漁溪有正傳
二十四年程主簿
已知隨柳過前川

天教觀物作閒人
不是偷安故隱淪
要識邵家風月興
一般花鳥華山春

寒氣常侵一半春
詩家道體說來真
不教曉入雄鷄口
誰喚南牕打睡人

湯鼎石壇老眼親陰陽誰見屈中伸年來併識顏家樂
十月天教薺麥春

癸酉新居雜詩九首

一時賓主記從容萬古風流在洛中未敢空中望唐節
且從實地學溫公

邢恕無端尚可優朱王那肯復蘇讎程門萬古春風在
百草千花得自由

野店欄衫蓋世雄徂徠几杖列兒童平生自恨無師友

千古空聞圯下風

一語希文鑄大儒太山纔了又橫渠紛紛諸子燈前寢
未管春風朽木蘇

樂事相關禽對語生香不斷樹交春程家若要觀生意
却恐鳶魚盡不真

野色更無山隔斷天光直與水相通不須中夜深思省
卧我高樓霽雨中

牛山昨日恨相忘今日齊苗苦未長會待明年新雨足

功夫留著護牛羊

投詩廁裏紛紛口置筆
藩間苦苦心千古高風一瓢飲
不從文字得知音

仲舒不草漢三策韓愈欲成唐一經
三百年來麟未泣
不知編簡向誰青

道境

道境相看滿面春
平生心事數來真
南山正在悠然處
未肯回頭錯應人

漫題

乾坤未覺化機停，世態難逃醉裏醒。
共見白雲又蒼狗，豈知螺贏即螟蛉。

漫記 四首

天幙高懸兩部蛙，水光山色照黃家。
忘情未便真忘得，憶竹栽蘆強自誇。

我自無行便是藏，更將何物要韜光。
東臯幸有牛溪在，卻向長安說醉鄉。

百錢破釜發長嘆一局羸棋為解顏
擾擾自無安脚處
幾人打透利名關
透得利名關便是小歇處見趙顯卿手簡
應物何嘗累我真
禪家怖死強忘身
昨朝一讀雍行錄
卻笑當年墮甌人

感興七首

江山心境儘風神
弧矢襟期記此身
說與求田田舍叟
遨遊何必故鄉春

優游千古禍成胎
冷雨踈烟撥不開
卻喜夷吾成霸業

又思漢武亦英材

天理胸中霽欲流黃浮眉宇酒浮甌生香似見花交樹
引得將蜂舞不休

霜落江湖水太清巖巖山色欲秋爭爭如一覺南牕睡
門外春風草自榮

功名藉口為蒼生唐漢英風未易輕千載興亡舒卷了
區區勲業亦何成

斷簡殘編絕賞音誰從百鍊見真金龍門千古遺歌後

更覺良工獨苦心

按劍無人誅武后
斲棺終恨貸朱梁
一杯爽氣迎秋集
何處雲山是致堂

書事 五首

當年一線魏瓠穿
直到橫流破國年
草滿金陵誰種下
天津橋畔聽啼鵲

卧榻而今又屬誰
江南回首見旌旗
路人遙指降王道
好似周家七歲兒

朱張遺學有經綸不是清談誤世人
白首歸來會同館
儒冠爭看宋師臣

風節南朝苦不伸
汴流直要到崑崙
世宗一死千年欠
此是黃河最上源

唱徹芙蓉花正開
新聲又聽採茶哀
秋風葉落踏歌起
已覺江南席捲來

試筆

眼花不見羲之俗
口快爭言杜甫村
擬欲鑿山藏此筆

高情千古約重論

讀史

中才隨世就功名恰似焦桐爨下鳴到底中郎唯兩耳
人間多少不平聲

讀史漫題

眼底權奸漢室空伯喈文舉亦才雄王畿廟號關何事
亦在區區論建中

梁甫吟

功名且就漢庭多畢竟曹瞞累我何汶上千年英氣在
有人梁甫正高謠

寫真詩卷 三首

龍祠岳廟盡冠巾雨露何關土木身不是二程窮物理
誰從一髮辨天真

彼此相懸一髮邊聖賢廟貌幾千年周郊自有園丘在
莫道金人便是天

共說雲雷起畫龍聲容誰道影堂空含糊若信俗儒論

已落三家僭禮中

曾點扇頭 二首

晉楚英雄管晏才當時真眼尚誰開
狂生攜著魯兒子獨向舞雩風下來

獨向舞雩風下來坐忘門外欲生苔
歸時過着顏家巷說與城南華正開

燕居圖

伊川門外雪盈尺茂叔牕前草不除
要識唐虞垂拱意

春風元在仲尼居

堯民圖

皐變遺像凜猶存更比凌烟意氣真但使尊前有如此
不慚只作許東隣

許由棄瓢圖

人間洪水正橫波堂上南風入浩歌兩耳區區無著處
一瓢孰與萬幾多

夷皓

萬古人心自有堯直教夷皓怨難消憑誰移去安歸嘆
換作康衢擊壤謠

龜蓮圖

龜約蓮香上翠盤四靈長向畫中看題詩記我千年恨
風月無聲洛水寒

畫李渤聯德高蹈圖

五首

方寸無窮皦皦天豈惟毛髮要歸全臨終一聽曾元語
愈嘆黔婁有婦賢

天意行藏我自知區區猿鶴亦何為室無萊婦君休恨
免使狂歌誚仲尼

江湖魏闕有心期莫恠先生起太遲寄謝移書韓博士
山妻元不解啼飢

諸生課罷弄烟霞紡績乘閒為煮茶白鹿高風有誰繼
草堂貧女悔菴家

萬里江鷗不易馴百年我愛隱君秦歸來匹婦休相笑
老眼真能混世塵

幽人圖 二首

無媒路逕草蕭蕭
山鬼修篁夢轉遙
手撚幽香意何遠
為誰終日面蒼堯

澗響無心和
考槃雲容有意近
長安野猿窺破中宵夢
卻恐山靈不易謾

高卧圖

萬里青山卧平地
世間何物是元龍
無人說與劉玄德
君在青山第幾重

華山圖

水墨驚看太華蒼夢中千載果難忘三峰雖乞希夷了
應許劉郎典睡鄉

孫尚書家山水卷

三首

扁舟老樹傍蒼崖好似今秋雪嶺迴試問黃塵山下渡
幾人曾為看山來

諸公久矣笑吾貪是處雲山欲結菴只有皇卿解贊助

畫山須畫靜修龕

謂皇甫安國

畫圖題品代移文寄謝神州老使君欲乞龍山恐孤絕
南州隆慮且平分

郭氏家山圖

鹿門烟影接隆中翁媼通家社酒紅只有山童最神駿
舊曾床下拜龐公

雲山晚景圖

天機濃淡出巖姿夢境風雲入壯思畫裏青山照白髮
行藏渾似倚樓時

春雲出谷橫披

筆底天機幾許深
雲容直欲見無心
苦心只許時人會
不為題詩亦未尋

秋山平遠圖

南山千古一悠然
誤落關仝筆意邊
急著新詩欲收領
已從慘澹失天全

郭熙山水卷

品姿秋意淡無弦
烟影天機滅沒邊
更看山翁掩書坐

只應人境兩脩然

李伯時馬

足不能行氣自馳
天機深處幾人知
世間無物能形此
除我南牕兀坐時

祖愚菴家藏畫冊二

二首

敗荷野鴨

畫裏瀟湘自要秋
詩家野鴨謾多愁
試看翠減紅銷處
好稱江清月冷舟

風柳牧牛

遠意昇平畫不勝牛邊烟樹渺層層
前頭恐有桃林路百喚溪童不解應

題宋理宗詩卷後

已未天王自出師眼前興廢想當時
臨江釃酒男兒事誰向深宮正賦詩

里社圖

賦薄徭輕復有秋天恩帝力為誰優
老盆醉殺村夫子

盡道今年好社頭

亂後疲民氣未蘇
荒烟破屋半榛蕪
平生心事羲皇上
回首相看是畫圖

靜修集卷十七

欽定四庫全書薈要卷一萬六千二百七十四

集部

靜修集卷十八

遺詩六

元 劉因 撰

七言絕句

六十
一首

新居

萬事休關百病身
書囊藥裹最相親
年來愛與漁樵話
恐有無心失位人

偶書

平生積學連城壁萬古虛名衆口金
午睡覺來門巷靜
雨晴風細鴿笙鳴

晝睡

世事悠悠莫謾驚直消鼻息幾雷鳴
高松似會幽人意
也學鶻鶻枕上聲

睡起

晚醉城南不記回
虛簷高枕藉莓苔
酒醒涼意瀟瀟在
應是前山送雨來

客來

老懶相逢口倦開
山城無酒慰衰衰
家僮使慣知人意
豫設棋枰待客來

對碁

直釣風流人素琴
也應似我對棋心
道人本是忘機者
信手拈來意自深

題樹上

不脫蓑衣睨網回
芒鞋隨意趁蒼苔
忽聞人語還私笑

林外誰呼學士來

名吾山亭

平生心事與山親，不忍稱呼作此君。
亭自屬君山屬我，四時風景要平分。

憶飲山亭

但得酒同張野飲，猶勝事對阮生論。
它年乞我園亭住，便喚西疇下溪村。

書田舍壁

里胥初過期無事營懃遲來望有年鄰舍借醅留客宿
土床分席枕瓜眠

絕句

今朝客為求文至昨日隣嫌借米移木枕質錢多舊帖
看囊不必要新詩

山家

孟氏養親惟小園董生有吏索租錢留詩自媿非韓杜
聊記林宗識子賢

山行遇雨

無邊暮雨暗山前
天意人情豈偶然
衡岳自能裛吏部
嵩高元不識伊川

喜雨書事

四首

拍手兒童笑不休
笑君前日為誰憂
天公自有甘霖在
未管渠儂浪白頭

一笑黃河一度清
自緣無物盡歡情
今朝久旱雨三尺
消得山人酒滿傾

坐占庭蟻戰餘酣一飽無功益自慚但見人人厭梁肉
野夫方覺薺苗甘

為驗陰晴看漏星要知疎密候簷聲夜來還却當時睡
不脫蓑衣直到明

即事

雲白天青浩不收雨晴山色欲無秋淡烟衰草闌何事
落日紅波空自愁

登樓絕句

倚遍闌干十二樓
卷舒風景入兵籌
南山自古為勍敵
秋色終當讓一頭

山寺早起

松牕一夜遠潮生
斷送幽人睡失明
夢覺不知春已去
半簾紅雨落無聲

萬壽宮館舍

來時殘雪點征衣
落盡庭花尚未歸
夢裏不知身尚病
春衫歸路馬如飛

答問目執其兩端章

不是黃河且勿論只從河水覓通津西至崑崙東至海
從頭一一認來真

次人韻 二首

花落歸根恐未真又從碩果強尋春玄都觀裏桃千樹
誰是前身與後身

桃花結子更生孫千樹玄都作好春若遇禪家說生死
桃根拈與饕頭薪

狂生

放曠无端更自神豪誇欺世語誰真如何老阮無情甚
不願兒郎作大人

蠢齋

莫倚蠢愚遂自疎保身須要畏刑書頭邊既有儒冠在
誰為齋名赦得渠

勉齋

萬選千蹊各自分北轅適越亦徒勤勉齋究竟將何勉

不認途真恐誤君

踈齋 二首

漫浪隨時輒自更要從僻處到無名踈齋未便常為主
月旦明朝有後評

眼前萬事先天圖人力那容巧有餘看盡四傍文理密
環中空闊卻如初

寒食

執綏猶恐墮危傾感悅厯還損靜貞欲看人間家道正

重門深閉過清明

夜坐即席分賦燈花餅聲

眉間正有喜千丈眼底纔消燈一華我自無憂安得喜
不須開向野人家

萬丈潮頭落晚江一餅收拾入秋牕宮商不在人間世
鼻息雷鳴未肯降

紙帳

閒中今古道中身靜裏乾坤夢裏神放下蒲團閒打坐

紙簾和月一壺春

謝處士載月圖

扁舟西子五湖過
謝客西風兩鬢皤
一種清江明月底
憑君試問夜如何

昭君扇頭

二首

武皇重色思傾國
趙氏承恩亦亂宮
自售懸知非靜女
漢家當論畫師功

不忍紛紛醜女顰
百年孤憤漢宮春
一身去國名千古

多少名臣學婦人

僧惠崇柳岸游鵝圖

河堤烟草柳陰勻
舒鴈羣游意自馴
此是吾鄉舊風景
畫中相見亦情親

題孫氏永慕圖

畫其家山
先壠所在

游宦恐忘丘壠念
披圖如對白雲孤
平生畫卷看多少
最愛孫家永慕圖

陶母剪髮橫披

剪髮英明子可知披圖三嘆淚雙垂
阿娘襟量如陶母
爭信痴兒到老痴

跋遺山墨跡

晚生恨不識遺山每誦歌詩必慨然遺墨數篇君惜取
注家叅校有他年

王君願縱私屬詩卷

共賦人形覆載間忍教牛馬與同欄
人情比比王褒約
毀券如君亦自難

朱孝子割股詩卷 二首

採本戕枝亦可憐
粉身爭忍欲崩天
詩書明日良心在
應對瘡痕一泣然

便律韓文恐太偏
狂童十歲亦堪憐
偶從德色耰鋤看
重為朱郎賦此篇

陳雄州止善堂詩卷

久被邦君撫養慈
野人無路識風姿
願將明日甘棠詠
用續諸公止善詩

王治中請蠲免回

都南連歲水為灾輸挽區區亦可哀驚見流民行復止
傳聞昨日治中來

賀廉侯舉次兒子

相國當年病且貧乘除天理暗中存青青後樂堂前樹
又見廉泉第二孫

長卿兒子阿延百晬二首

老年生子吾何願所願常推欲及人但願無灾保家外

一生長作太平民

和子新年亦解狂詩中名姓莫相忘
通家會有西山約
合喜簷門共父長

答友人見寄

兩首新詩寄草堂一詩曾許卜隣牆
白雲已領歸來約
只恐山靈不解忘

寄毛得義

白沙翠竹北比隣夢想南湖老
聘君遙憶郡樓風景好

幾時同看暮山雲

寄楊晉州 二首

曾是吾鄉舊幕官
秋風碧水記紅蓮
而今卻憶當時事
回首驚看二十年

南州選舉數三楊
中統衣冠半在亡
明日朝廷訪耆舊
不應白首尚為郎

郝生知林州

到處雲山是我詩
不愁無物慰相思
只從隆慮烟霞色

領取幽人笑傲姿

送琴客還池州 五首

江左衣冠自昔聞
紫陽遺學竟誰真
抱琴為向山中聽
林下寒栖恐有人

謫仙胸次九芙蓉
又落人間劫火中
浦思山哀天不管
為絃五曲和松風

過手春風不見痕
曲中悲壯宛猶聞
明朝無限空山夜
月白風清覺少君

人物翩翩美少年不應心事只揮絃書中名理琴中趣
更有歸鴻目外天

日暮江東有所思未須千里寄吾詩但看西北浮雲盡
是我倚樓閒望時

送新安田尹

扁舟屢訪南溪老驚見田侯拜下風一遇蓋公能北面
愛君心與故人同

朱君挽章

送葬曾求薤露辭一家風樹衆人悲十年不廢當時念
篤孝如君亦我師

李臨城哀挽

仲溫

趙郡經過二十春臨城名姓舊曾聞驚看哀誄傷存沒
悵望恒山日暮雲

樂府

十一
首

水調歌頭

同諸公會飲王氏飲山亭
索賦長短句倣晦翁體

一諾與金重一笑對河清風花不遇真賞終古未全平

前日青春歸去今日尊前笑語春意滿西城華鳥喜相
對賓主眼俱明平生事千古意兩忘情我醉眠卿且去
扶我有門生牕下烟江白鳥牕外浮雲蒼狗未肯便寒
盟從此洛陽社休厭小車行

念奴嬌

良憶仲

中原形勢東南壯夢裏譙城秋色萬水千山收拾就一
片空梁落月烟雨松楸風塵淚眼滴盡青青血平生不
信人間更有離別舊約把臂燕南乘槎天上曾對河山

說前日後期今日近
悵望轉添愁絕
雙闕紅雲三江白
浪應負肝腸鐵
舊游新恨一生都付長缺

喜遷鶯

乙亥元日

春風滿面是胸中
春意與春相見不醉陶然無人也笑
況是一年清宴
寧兒挽鬚學語
爨婦舉杯重勸道維願
貧常圓聚老常康健
二十七年世事經千變
今是昨非
春思花柳消盡
冰霜殘怨
門外曉寒猶淺
門上垂簾休
捲燈花軟
酒香濃趁歌聲試輕輕嚙

南鄉子

題外甥郭氏
留耕堂壁上

方寸足留耕大勝良田萬頃平陰理不隨陵谷變分明
霜落西山滿意青千載董生行雞犬昇平畫不成終日
相看天與我高情身外浮雲自古輕

二

張彥
通壽

牕下絡車聲牕外兒童課六經自種塲東新菜莢青青
隨分杯盤老幼情千古董生行雞犬昇平畫不成應笑
東家劉孝子無能縱飲狂歌不治生

菩薩蠻

王利夫壽

吾鄉先友今誰健
西隣王老時相見
每見憶先公音容
在眼中
今朝故人子為壽
無多事惟願歲長豐
年年社酒同

朝中措

廉公惠正
議舉兒子

金張家世費貂蟬
七葉侍中冠
若就詩家攀例
生兒合喚添官
憑誰寄語
廉泉父老
斗酒相歡
今歲孫枝新長
甘棠消息平安

臨江仙

次廉侯舉兒子

四海荊州吾所愛，虎賁誰似中郎子孫。今擬喚甘棠，添
官前有例，簪笏看攤床。明日乃公歸舊隱，後園喬木蒼
蒼。青衫竹馬鴈成行。當年廉孟子，應有讀書堂。

二

送王從事

行色匆匆緣底事，山陽梅信相催。梅花香底有新醅。南
州今樂土，得意且銜杯。君見太行憑寄語，雲間蒼壁崔
嵬。平生遮眼厭黃埃。高樓吾有興，無惜送青來。

西江月

送張大經


留在平生落落休嗟世事滔滔青雲底柱本來高立向
顏波更好一片花飛春減可堪萬點紅飄江華江月可
憐宵莫賦招魂便了

二

贈趙提學酒

買得雞泉新釀病中無客同斟遣人持送旅窩深呼取
毛翁共飲少箇散花天女維摩憔悴難禁安排走馬杏
花陰咫尺春風似錦

静修集卷十八



總校官庶吉士臣張能照
校對官檢討臣盧應
謄錄監生臣夏毓圻